

**Kultureqarnermut, Ilinniartitaanermut, Iisimatusarnermut Ilageeqarnermullu
Ataatsimiititaliap**

**Siunnersuut uunga: Isiginnaartitsisarfeqarneq pillugu Inatsisartut inatsisaata
allanngortinnera pillugu Inatsisartut inatsisaat nr. xx, xx. xxx 2019-imeersoq**
Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq

Pillugu

ISUMALIUTISSIISUTAA

Siunnersuutip aappassaanneerpeqarnerani saqqummiunneqartoq

Kultureqarnermut, Ilinniartitaanermut, Iisimatusarnermut Ilageeqarnermullu
Ataatsimiititaliap suliaqarnermi kingullermi makkuninnga inuttaqarpoq:

Inatsisartunut ilaasortaq Doris J. Jensen, Siumut, siulittaasoq
Inatsisartunut ilaasortaq Mimi Karlsen, Inuit Ataqtigiit, siulittaasup tullia
Inatsisartunut ilaasortaq Aqqaluk Heilmann (sinniisoq), Siumut
Inatsisartunut ilaasortaq Nivi Olsen, Demokraatit
Inatsisartunut ilaasortaq Sofia Geisler, Inuit Ataqtigiit

UKA2019-imi ulloq 25. marts siunnersuutip siullermeerlugu oqallisigineqarnerata kingorna
siunnersuut ataatsimiititaliamit misissorneqarpoq.

1. Siunnersuutip imarisaa siunertaalu

Nunatta Isiginnaartitsisarfiata siulersuisuisa aqutsinermik ilisimasaqartumik
toqqaasoqartarnissaata qulakkeerneqarnissaanik kissaateqarnera akuersaarlugu matumuuna
Naalakkersuisut inatsisissatut siunnersuusiorput. Tamatuma saniatigut Naalakkersuisut
siunnersuutigaat (kalaallit isiginnaagassiortartut peqatigiiffiata) KAISKA-p
atorunnaarneratigut tamatumalu saniatigut SILA pilersinneqarneratigut (maannakkut kalaallit
isiginnaagassiortartut peqatigiiffiat) KANUKOKA-llu atorunnaarnerat aallaavigalugu inatsit
nutarterneqassasoq. Isiginnaagassiortartut peqatigiiffiata siulersuisuisa inatsisip § 1-ia
tunnngavigalugu peqatigiiffinni ataavartumik allannguisarsinnaanerit tamatumunnga
ilanngullugu siunnersuutigineqarpoq. Naggasiullugu Nunatta isiginnaartitsisarfiata
assigisaannilu atorfinitsitsisarnerit pillugit tunnngaviusumik isumaqatigiissusiornissamut
piginnaatitsisoqarpoq.

2. Tusarniaanermi akissutit

Tusarniaanermi akissutit inatsisissatut siunnersuummut ilanngunneqarput, tamannalu inatsisartut siulersuisuisa ilusilersuinissamut piumasaqaataannut naapertuuppoq. Tusarniaaffigineqartut tusarniaanermullu piffissaritinneqartoq siunnersuummut oqaaseqaatini immikkoortoq 8-mi takuneqarsinnaapput. Naalackersuisut tusarniaanermut akissutitut piumassuseqarlutik naaperiaasimanerat ataatsimiititaliamit pitsaasutut isigineqarpoq, taamaalillutillu soqutigisaqartut oqaaseqaatitut nassiussimasaat tunngavigalugit inatsisissatut siunnersuut aaqqissuussimallugu.

3. Inatsisissatut siunnersuutip nassuiarneqarnera

Ulloq 21. marts 2019 inatsisissatut siunnersuut pillugu ataatsimiititaliaq nassuiaaffigineqarpoq. Ilinniartitaanermut, Kultureqarnermut, Ilageeqarnermut Nunanullu Allanut Naalackersuisoq ataatsimiinnermi peqataavoq.

4. Ataatsimiititaliap siunnersuummik suliaqarnera

Inatsisip atuuttup naleqqussarneqarnissaanik pisariaqartitsinerup siunnersuut manna kingunerigaa ataatsimiititaliamit paasisimaneqarpoq – pisariaqartitsineq Nunatta Isiginnaartitsisarfanit namminermit oqaatigineqarpoq. Kalaallit isiginnaartitsisartut kattuffiat inatsisip §4, imm. 2 tunngavigalugu atorunnaarsimasoq ataatsimiititaliamit maluginiarneqarpoq, tassami kattuffik taanna siunnersuutip nalinginnaasumik oqaaseqaataani allassimasutut atorunnaarsimammat.

Siunnersuutip § 1, nr. 3-ani makku takuneqarsinnaapput:

3. § 4-mi imm. 4-p kingorna immikkoortut nutaatut ilanngunneqassapput:

” Imm. 5. Kattuffiit imm. 2, nr. 1, 3 aamma 4-mi eqqaaneqartut arlaat taaguuminik allannguissagaluarpat inassuteqarneq taassumangga isumagineqassaaq.

Imm. 6. Kattuffiit imm. 2, nr. 1, 3 aamma 4-mi eqqaaneqartut atorunnaarsinneqassagaluarpata Naalackersuisut ilaasortamik toqqaassapput kattuffiup atorunnaarsinneqartup suliassaqarfigisimasaanik ilisimannittumik.”

Inatsisip § 4, imm. 2-a tunngavigalugu peqatigiiffiup innersuussisinnaasup atorunnaarsinneqarnerata kingunerisaanik peqatigiiffimmik nutaamik pilersitsisoqassappat, inatsisissatut siunnersuut akuerineqareeraluarpuunniit pisariaqarsinnaavoq suli inatsimmik allanngortitsinissaq. Peqatigiiffik innersuussisinnaasoq taaguutiminik allannguisimappat aalajangersagaq qulaani pineqartoq atuutissaaq.

Nunatta Isiginnaartitsisarfiata Naalakkersuisullu atorfinitsitsisarneq pillugu tunngaviusumik isumaqatigiissutaat Nunatta Isiginnaartitsisarfiata malissagaa siunnersuutikkut peqqussutigineqarpoq. Aaqqineq tamanna nalinginnaasumik oqaaseqaatini tunngavilersuutit uku malillugit qinerneqarsimavoq:

“Nunatta Isiginnaartitsisarfianni sulisut ilarpassui isumaqatigiissutinut ilaanginnerat, atorfinnullu taamaattunut isumaqatigiissusiortoqarsimanginnera tamatumunnga tunngavilersuutaapput. Aamma pilersaarutinut atorfinitsitsisoqartarnera atorineqangaatsiarpoq, atorfiillu taakku Namminersorlutik Oqartussani atorfinnut allanut assersuukkuminaassinnaallutik”

(Ataatsimiititaliap erseqqissaanera)

Nunatta Isiginnaartitsisarfianni atorfinitsitsisarnernut ersarinnerusumik isumaqatigiissusiorsinnaanerani aalajangersaasoqarnera ataatsimiititaliamit pitsaasutut isigineqarpoq – tamanna suliffeqarfimmut tunngatillugu, kisiannili aamma sulisut illersorneqarsinnaanerannut tunngatillugu. Qulaani issuaanermi naatsorsuutigineqarpoq, Nunatta Isiginnaartitsisarfianni sulisut ikinnerusut isumaqatigiissutit tunngavigalugit suliffeqartut. Sulisunut isumaqatigiissutinik atuisinnaanermut tunngavissaqartumik tunngaviusumik isumaqatigiissut atuutissanngitsoq taamaalillugu ataatsimiititaliamit naatsorsuutigineqarpoq. Atorsinnaasumik isumaqatigiissuteqartillugu, Nunatta Isiginnaartitsisarfianni sulisunik atorfinitsitsinermi tunngaviusumik isumaqatigiissummit taakku sallitinneqartarnissaat taamaalilluni tunngaviusumik isumaqatigiissummi innersuunneqarsinnaavoq. Taakku atuutissanngikkaluarpata, tunngaviusumik isumaqatigiissummi nalinginnaasumik aalajangersakkat atuutiinnartussaapput. Nunatta Isiginnaartitsisarfianni imaluunniit Naalakkersuisunit tamatuma kissaatigineqannginnera naatsorsuutigineqarsinnaavoq. Taamatut oqaasertaliinermut Naalakkersuisut isumaqataangippata siunnersuutip aappassaaneerineqarneranut atatillugu tamanna Naalakkersuisut ilisimatitsissutigissagaat tunngavilersorlugulu ataatsimiititaliamit qinnutigineqassaaq.

Allatigut oqaaseqaateqarnissamut ataatsimiititaliaq tunngavissaqanngilaq.

5. Siunnersuutip aningaasatigut kingunerisassai

Siunnersuutip aningaasatigut kingunerisassai nalinginnaasumik oqaaseqaatinut ilanngunneqarsimapput. Taamaasillugu takuneqarsinnaavoq siunnersuut aningaasatigut kinguneqartinneqassanngitsoq. Tamanna allatut oqaaseqarfiginagu ataatsimiititaliamit tusaatissatut tiguneqarpoq.

6. Ataatsimiititaliap inassuteqaataa

Ataatsimiititaliap **isumaqatigiittup** siunnersuutip **akuersissutigineqarnissaa** inassutigaa.

Taamatut oqaaseqarluni isumaliutissiisummilu allassimasutut paasinnilluni matumuuna ataatsimiititaliap siunnersuut aappassaaniigassanngortippaa.

Doris J. Jensen
Siulittaasoq

Mimi Karlsen
Siulittaasup tullia

Aqqaluk Heilmann

Nivi Olsen

Sofia Geisler